

समे – 12:25

<><><><><><>

Jaishankar US

विदेश मंत्री डाक्टर एस. जयशंकर होरें आखेआ ऐ जे राष्ट्रपति डोनाल्ड ट्रम्प हुंदे नेतृत्व च अमरीका प्रशासन इक ऐसे बहु-ध्रुवीयता आहली बवस्था बक्खी अगड़ा बधै करदा ऐ जेह्दे च ताकत अख्तियार ते रसूख दे इक कोला मते केन्द्र हुंदे न। उ'नें आखेआ जे एह बवस्था भारत दे हितें दे अनुकूल ऐ। डॉ. जयशंकर होरें गलाया जे राष्ट्रपति ट्रंप हुंदे नेतृत्व च अमरीका दी विदेश नीति च बदलाव दी मेद पैहले गै कीती जा करदी ही ते एह केई मायने च भारत दे हितै च ऐ। विदेश मंत्री होर कल सं'झां लंदन दे चैथम हाउस थिंक टैंक च 'भारत दा उदय ते दुनिया च एहदी भूमिका' विषय पर इक सत्र गी संबोधित करै करदे हे। डॉ. जयशंकर होर बरतानिया ते आयरलैंड दी 6एं दिनें दी जात्तरा पर न। विदेश मंत्री होरें आलमी सतह उप्पर बदलदी बवस्था, ऊर्जा, तकनीक ते कनेक्टिविटी सरबंधी पैहलकदमिएं दा हवाला दि'दे होई आखेआ जे अमरीकी राष्ट्रपति ते उ'दे प्रशासन दिआं केई प्राथमिकतां भारत लेई नमीं मेदें कन्नै भरोची दिआं न।

<><><><><><>

LOP

विधानसभा च विपक्ष दे नेता ते बीजेपी दे विधायक सुनील शर्मा होरें विदेश मंत्री डॉ. एस. जयशंकर हुंदे उस ब्यानै दा सुआगत कीता जेह्दे च उनें होरें आखेआ ऐ जे कश्मीर दा मुद्दा उसलै अपने आप हल होई जाग जिसलै जम्मू कश्मीर दा पाकिस्तान दे नजैज कब्जे आला इलाका बी वापस आई गेआ। विदेश मंत्री होरें एह गल्ल लंदन दे चथम हाउस थिंक टैंक विचार गरेयटी च "दुनिया च भारत दा उत्थान ते भूमिका" विषय पर आयोजत संत्र दरान आक्खी। सुनील शर्मा होरें आखेआ जे जदूं पाकिस्तानी कब्जे आला जम्मू कश्मीर बी वापस साढ़े कश आई गेआ तां कोई मुद्दा बकाया नेई रौहग। उनें आखेआ जे दफा 370 हटाए जाने दे बाद जम्मू कश्मीर च बड़ा मता विकास होआ ऐ, जीडीपी च बाद्धा दिक्खने गी लब्धा ऐ ते पूरा जम्मू कश्मीर रमानदारी ते तरक्की दी बत्तै पर अगड़े बधै करदा ऐ।

<><><><><><>

Sakina Education

2024-25 द आली माली ब'रे दरान यूटी जिला केपैक्स बजट ते समग्र शिक्षा तैहत मंजूर 4 करोड़ 72 लक्ख 74 जहार रपे दी रकमै चा 1 करोड़ 5 लक्ख 88 जहार रपे बिलावर हल्के दे स्कूलें लेई जारी करी दित्ते गेदे न। एह जानकारी शिक्षा मंत्री सकीना इत्तू होरें अज्ज बिलावर थमां विधायक सतीष शर्मा हुंदे आस्सेआ पुट्टे गेदे इक सुआले दा परता दिंदे होई दित्ती। उनें इब्बी दस्सेआ जे लैक्वररें दियां खाली पेदियां 594 असामियां बी पुर करने लेई बी जम्मू कश्मीर लोक सेवा आयोग गी रैफर करी दित्तियां गेदियां न ते बक्ख-बक्ख कैडटें च होर असामिएं दी बी ताल कीती जा'रदी ऐ। मंत्री होरें दस्सेआ जे स्कूलें च स्टाफ दी कमी गी सीआरसी राएं पूरा कीता जा'रदा ऐ।

<><><><><><>

ADGP-Visit

जम्मू कश्मीर आर्म्ड पुलस दे अतिरिक्त पुलस महानिदेशक आनंद जैन होरें कल उधमपुर दे दिल्ली स्थित आईआरपी 24मीं बटालियन दा दौरा कीता ते बटालियन मुख्यालय दे जारी निर्माण कम्में दा मुआयना कीता। इस दौरे दरान एसएसपी उधमपुर अमोद अशोक नागपूरे ते बटालियन दे कमांडेंट एसएसपी मोहम्मद असलम बी उंदे कन्नै हे। साढ़े जिला संवाददाता अचिन दूबे नै जानकारी दित्ती ऐ जे एडीजीपी होरें बटालियन परिसर सुई उधमपुर दे इलावा रामनगर रेलवे स्टेशन ते शेर-ए-कश्मीरद पुलस अकादमी थाहर कंपनी दे ठकाने दा बी निरीक्षण कीता। इस मौके उनें कम्में दी रफ्तार दा जायजा लैता ते इंजीनियरें गी कम्में दी रफ्तार च तेजी आहन्नने लेई आखेआ तां जे बटालियन मुख्यालय दा निर्माण पूरा करियै कम्में कारवाइएं लेई चालू कीता जाई सकै।

<><><><><><>

DC Rajouri Projects

राजौरी कस्बे दी खूबसूरती दे छलैपे गी होर सनाहखड़ा बनाने लेई जिला विकास कमीशनर अभिषेक शर्मा होरें कल इक "सौंदर्यकरण" अभियान दी शुरुआत कीती। एहदे तैहत कस्बे दे एयरफील्ड ते एहदे कन्ने लगदे इलाकें गी सलाया सोआरेआ जाग तां जे उत्थुआं लंघने आलें गी आले दोआले दा नजारा आकर्षण लग्गै। डीसी हुंदे निजी तौरा पर दिलचस्पी लैने ते कन्ने फौज ते आम जनता दे सैहयोग कन्नै इस इलाके गी खूबसूरत ते साफ सुथरा बनाने च मदद होग। इन्ना गै नेई एह लोकें दी भलाई बेहतरी ते शैहरी विकास च सिविल प्रशासन ते भारतीय फौज दे तालमेल ते सैहयोग बारे बी दर्शादा ऐ। इस परियोजनाएं गी शुरू करने

लेई 50 लक्ख रपे दी रकम बक्ख रक्खी गेदी ऐ ते जियां जियां कम्म अगड़े बधोग एहदे लेई होर रकमां बी बागुजार कीतियां जांगन।

<><><><><><>

IGNOU

केन्द्री मंत्री डॉ. जितेन्द्र सिंह होरें कौशल आधारित शिक्षा ते सूचना ते संचार टैक्नालोजी दी महत्वता पर लोह पांदे होई इंदिरा गांधी राश्ट्री मुक्त विश्वविद्यसलय(आईजीएनओयू) इग्नू आस्सेआ गुणवत्सपूर्ण शिक्षा सामग्री गी उपलब्ध कराने लेई 6 स्वयं प्रभा चैनलें दा संचालन करने आस्तै ओहदी सराहना कीती। डॉ. सिंह होरें एह गज्ज जम्मू च आयोजित इग्नू दे 38में दीक्षांत समारोह दे कार्यक्रम दे दरान आक्खी। साढ़े जम्मू जिले दे संवाददाता अंकुश शर्मा हुंदे मूजब केन्द्री मंत्री होरें अपने संबोधन च आखेआ जे 2047 तगर विकसित भारत ते निर्माण आस्तै नोजवानें दी इक अहम भूमका ऐ। उनें नोजवानें दा आह्वान कीता जे बदलाव दी इस यात्रा च ओह जोरें—शोरें कन्नै हिस्सा लैन। इब्नू दे इस दीक्षांत समारोह च 11 जहार 293 स्नातकें गी डिग्रियां प्रदान कीतियां गेइयां न।

<><><><><><>